

JUNIOR

DRENTS BLAD VEUR KIENDER

2012



PUZZELN



LEZEN



KLEUREN

Hoi,

Dit is een blad veur Drentse
kiender. Der staot twei heufd-
stukken in van het boek

Een haand achter 't gerdien.

En ok gedichten en puzzels waor aj
mooie priesen mit winnen kunt aj
het antwoord opstuurt.

Je pap en mam mugt je daor gerust
bij helpen.

En veur de allerkleinsten: een
kleurplaat!

Alles in dit blad is schreven in het
Drents. Want in Drenthe praot wij
Nederlands èn Drents!

Praot jij ok wel ies Drents?

Aj 't niet praot kuj het vaste wel
verstaan.

Veul plezier mit dat blad veur alle
Drèentse kiender.

En kuj zölf nog niet lezen?

Laot pap of mam het dan mar an je
veurlezen. Of opa of oma.

Der bint ok Drentse bladen veur de
groten. Op de achterkaant stiet der
meer over. Laot dat ok mar ies
lezen an je pap en mam!



Inhold

Van een vis...	3
Kamperen in het Hollebomenbos	5
Woepsien	7
Een haand achter 't gerdien (1)	8
Puzzel veur de groepen 4 en 5	10
Puzzel veur de groepen 6, 7, 8	11
Een haand achter 't gerdien (2)	12
Gedichties	14
Kleurplaat veur de groepen 1,2, 3	15

JUNIOR verschient ien maal in 't jaor (in meert) en wordt maakt
deur het Huus van de Taol, Postbus 163, 9410 AD Beilen.
Oenze webstee kuj vienden op www.huusvandetaol.nl en oens
e-mailadres is: info@huusvandetaol.nl

VAN EEN VIS DIE AS EEN HEKEL AN NAOKT HAR


Een vis die geern een stukken zwum
har altied een bikini um.
En as een aandere vis heur vreug
waorum zij een bikini dreug,
dan snibde ze: of hej misschien
hier argenswaor een naoktstrand zien?
Ik bin nou ien keer gek op kleeer
ok as ik zwem, dan weej dat weer!
En wel ies aans wat oetprebeert
is lichtkaans aans, maor niet verkeerd

De aandere vis zee: dat is waor,
dus gao je gang en zwem jij maor
gerust in die bikini rond.

Maor ik zwem in mien blote. . . . !

Suze Sanders





KAMPEREN IN HET HOLLEBOMENBOS

't Is aovend in het Hollebomenbos.

Op het mosveldtie stiet een oranje tentie.

In dat tentie zit Knientie Snuffel en Harrie Haos. An weerskaanten van een omgekeerde emmer.

Op die emmer lig een braandende zaklanteern, een kwartetspel, een leeg brummellimenaodeflessie en een lege chipspuut.

'Ik weet niet wat jij doet Snuffel', gaapt Harrie Haos, 'maor ik gao op bedde. Ik bin zo min as een tuut man.'

'Ik kan de doppen ok zowat niet meer open holden', meent Knientie Snuffel en springt op zien mosbeddegie.

Harrie grep de zaklanteern en nusselt zuk ok in het zachte warme mos.

'Kan 't licht oet Snuffel?' vrag Harrie.

'Wacht even', flustert Snuffel, 'der beweegt wat onder mij.'

Het knientie bekek zien bedde maor zöt niks bezunders.

'Knip maor oet die lamp en welterusten', zeg e.

'Ok zo', mompelt Harrie Haos.

'En toch beweegt er wat onder mij!' röp het knientie wat laoter.

'Net of het golft!'

'Je dreumt zeker daj an 't bootie vaoren bint', mompelt Harrie.

'Ik dreum niet!', zeg Snuffel. 'Knip 't licht even weer an Harrie!'

Zuchtend döt het haosie wat of hum vraogd wordt.

Nao een grondig bed-onderzoek zeg Knientie Snuffel: 'Snap jij dat nou?

Weer niks te zien!'

En weer schöf Harrie Haos het knoppie van de zaklanteern naor 'oet.'

'Lig je nou goed Snuffel?' vrag Harrie.

'Ja heur. Nee! Toch niet! Licht an Harrie! Gauw!'

Op het moment dat het licht anfloept wordt Snuffel opzied smeten!

'Wel snötverdubbeties nog an toe!' schrikt e. 't Liekt wel een eerdbeving!'

'Ja en die maok ik!' zeg een kleine zwarte...



'Moi Mollie Mol!' groet Harrie Haos vrundelijk. 'Woj ok kamperen?'
 'Nee man, ik wil slaopen! Dizze tent stiet liek boven mien slaophol!
 En deur dat gekwebbel van jullie krieg ik gien wenk in de ogen!' zeg de
 mol kwaad.

'Sorry Mollie, sorry!' begunt Snuffel, 'maor wij wuzzen toch niet dat jij
 onder oes...'

'Zo is dat!' onderbreek Harrie. 'Kun wij 't ok goed maoken met
 bosbessenlimenaode en wat chippies?'

'Moej wel op reken!' vindt Mollie Mol.

En het wordt mij toch gezellig daor in die tent!

Kwartetten, ganzeborden, mens-erger-je-nieten en eten en drinken!

Slaopen doet ze pas as 't al heel, heel laot is!



Vraag: Wat is een skelet in een kast?

**Antwoord: Das iene die lang eleden ewunnen hef mit
 wegkroepertie doen.**

**Johan komp veur het eerst op schoele. De juf vrag: 'Ken ie
 het alfabet al, Johan?' Johan zeg: 'Ja heur juf!' De juf
 vrag: 'Welke letters koomt er dan nao de A?' Johan zeg:
 'Alle letters, juf!'**

**Waorum kuj een moes niet melken?
 Umdat der gien emmer onder past.**





WOEPSIEN

As wij oes 't aovends ies verveelden
Dan meuk mien Opa schaduwbeelden.
Op de mure of 't gedien
Toverde hij maor zo een knien;
Veugels, hondties, grote reuzen
Stunden vlak veur oeze neuzen.


Maar wij vreugen altied weer:
'Toe, maakt Woepsien nog een keer!'

Wie was Woepsien, zuj wel zeggen.
Da's niet zo makkelijk uut te leggen.
Hij leek een beetien op een kikker.
En op een moes, allent wat dikker.
Maar eiglijk leek hij 't allermiest
Op een hiel bezunder biest.

Toen, op een keer, dat was wat zeg!
Naamp hij een sprong en wupte weg!

Veur 't glas reup hij nog even 'Moi!'
Mien Opa zee: 'O, gojje, goj!'
Nou, ie mag gerust wel weten:
Wij kunt oes Woepsien niet vergeten.
Aj hum toevalleg nog ies ziet:
Hij is van oes, vergeet dat niet!

Bonnie Veendorp



EEN HAAND ACHTER 'T GERDIEN

Dit Drentse kienderboek giet over de tienjaorige HJ. Eigenlijk heet hij Hendrik Jan, mar iederiene nuumt hum HJ. HJ woont samen mit zien pap, net buten een Noord-Drents dorp. Olde buurman Jan is een grote kammeraod van HJ.

Net as Rudy, waar hij al mit speelt vanof dat ze babies bint. HJ is een onderzokend ventie, in ieder geval in zien kop. Want wat is er an de haand mit het huus van buurman Abbing, dat zo lange leeg stund. Hij meende toch dat hij daor steeds wat zag? Of verbeelde hij hum dat nou? En is het waar wat de meiden op schoele zeden over Rudy? En waaromme wet hij niks over zien moeder? Iederiene wet toch waar zien mam is, waaromme wil gieniene der wat over zeggen? Aj tien jaor bint, bi'j gien klein kiend meer, dan wi'j gewoon ok weten wat de aandern weet.

En dus giet HJ op onderzoek, veurzichtig en een beetie benauwd. Mar ok dapper en hoopvol. En hij komp daorbij natuurlijk van alles tegen.

'Moej niet naor school, jonkie? 't Is al kwart over!'

HJ vuult een blos op zien wangen kommen.

'Staoj weer te dreumen?'

Buurman grip HJ zachies achter bij zien haor. Douwt hum veuroet.

Saomen loopt ze tot an buurmans hoes.

Trixy löp vlak veur buurman zien voeten. Zien steert kwispelt.

De achterdeur van het hoes stiet open. HJ zöt de roodgeblokte gerdienien zachies bewegen in de wind.

De grote eeltige haand van buurman lig in zien nek. Buurman bög zuch naor hum toe. HJ zöt zien grieze ogen en een spinnenweb van kleine rode aoderties op zien wangen.

'Tot vanmiddag', zeg buurman.

HJ kik langs hum hen. Opiens zöt e een vogel deur de achterdeur naor binnen vliegen.

'Der vlög een vogel in hoes!'



HJ rent naor de deur. Buurman klost achter hum an.
 In het portaal zöt HJ dat ook de deur naor de kamer lösstiet.
 De taofel is met een theedoek dekt, der lig een stuk kees op. En een homp
 brood. HJ kik rond. Op de liest van het schilderij boven de kachel zit de
 vogel. Buurman is nou ook binnen.

‘Och, een zwalvie’, zeg e zacht.

Het zwalvie schöt op van de liest en mak zigzaggend
 een vlucht deur de kaomer.

‘Hij mot der gauw oet, hij rak in paniek’, zeg buurman.

Het zwalvie landt op de gerdienrail.

HJ grep de theedoek van taofel. Hij löp veurzichtig in
 de richting van het zwalvie. Die vlög weer op en
 schöt tussen de planten in de vensterbaank. HJ gooit
 gauw de theedoek over het vogelie, dat stil zitten
 blif.

HJ pakt zachies doek en vogel op. Hij voldt de doek
 lös. Het vogelkoppie komp teveurschien.

‘Kiek ies, wat mooi’, fluustert HJ.

Buurman komp dichterbij.

De donkere veerties van het zwalvie glanst rood
 en blauw. Boven en onder de snaovel is een ronde plek
 van donkerrode veerties. De lange vörksteert trilt. Het kleine koppie van
 het zwalvie is diep wegdoeken in zien lief.

‘Laot hum maor gauw vrij’, zeg buurman.

Saomen loopt ze naor de achterdeur. HJ tilt zien haanden hoog op, en weg
 schöt het zwalvie. Hij vlög vort over het dak van de schuur.

‘Ik har nog nooit een zwalvie van dichtbij zien’, zeg HJ.

‘Wat bint ze mooi.’

‘En jij komt te laot. Vort, rennen, dan bel ik je meester um te zeggen daj
 der ankomt.’


HJ rent vort. Hij zwaait met zien arms. Hij vuult zuch bliede. Hij stöf
 veurbij de virtien hoezen. Veurbij het hoes achter de meidoornheeg.

Hij zöt de vrouw niet die achter het gerdien stiet.

Die hum met een glumlach naokik tot e oet het zicht is.



PUZZEL VEUR DE GROEPEN 4 EN 5



1. Hij zeg 'knor' en holdt van modder
2. Hier vien ie oen ogen, neus en mond
3. Aj het argens mooi viendt dan wil der wel ...
4. Dit hej aj denkt: 'dat had ik beter niet kunnen doen'
5. Mit gel derin stiet het rechtop
6. Dit dier hef bienen en gien poten
7. Klus eklaard!
8. De kat is dol op dit diertie
9. Vien ie dat mooi aj hier een piercing in hebt?

Van boven naor beneden in de grune vakkies lees ie:

Schrief de oplossing samen mit oen name, adres en woonplaats en de groep waar aj in zit naor:

Huus van de Taol, Postbus 163, 9410 AD Beilen.

Stuur de oplossing in veur 20 april 2012. Onder de goede inzendingen verloot wij een mooie prijs.

PUZZEL VEUR DE GROEPEN 6, 7 EN 8

D	U	N	D	E	R	B	I	E	S	T	I	E	S	B
E	K	R	E	K	I	E	L	S	T	E	V	E	L	R
K	I	O	E	P	R	R	P	A	P	R	A	G	E	A
Z	N	S	E	T	O	A	A	P	D	O	T	R	E	O
W	R	A	T	Z	S	L	W	W	O	E	I	U	Z	M
I	E	L	R	O	E	U	L	E	E	I	R	U	P	B
E	T	I	S	S	A	N	U	E	D	R	U	N	L	E
N	E	E	C	E	T	D	Z	D	V	N	B	E	U	S
E	I	M	H	I	I	E	R	E	E	U	A	E	H	S
K	F	K	A	R	E	M	B	E	E	E	E	A	F	E
O	N	O	O	G	W	E	O	O	V	R	W	H	M	M
P	A	E	P	L	I	E	S	B	T	E	T	T	C	D
E	I	L	U	E	R	E	T	E	I	P	I	E	R	S
G	I	K	K	I	M	E	K	K	A	R	K	D	O	E
N	S	K	R	A	W	N	E	T	E	O	B	T	S	R

ANFIETERN

BLADERN

BOETENWARKS

BOMIES

BRAOMBESSEM

DIEVERDAOTSIE

DUNDERBIESTIES

FEBREWARIE

GRIES

GRUUN

HEUIOPPER

HULPZEEL

KNARSTEBOT

KOEZENZEERTE

KRAKKEMIKKIG

LIEMKOEL

MAANDEWARK

PIETEREULIE

ROET

SCHAOP

SCHEUVELLOPEN

STEVEL

TWEEDUUSTER

ZWIENEKOP

Schrijf de oplossing samen mit oen name, adres en woonplaats en de groep waar aj in zit naor: Huus van de Taol, Postbus 163, 9410 AD Beilen. Stuur de oplossing in veur 20 april 2012. Onder de goede inzendingen verlost wij een mooie prijs.

EEN HAAND ACHTER 'T GERDIEN (2)

De regen is opholden. Nou blas de wind de bomen dreug. Of en toe valt der nog druppen op straat. In het westen wordt de lucht lichter.

HJ stiet bij de meidoornheeg. Hij kik achterom. Stiet Abbing hum nou nao te kieken? Hij zöt gienien.

De heeg is al helemaol gruu. An de bovenkaant steekt der lange sprieten oet. HJ kan der net overhen kieken.

Bij alle mensen in het dörp löp HJ altied naor de achterdeur die miestal lös is. De veurdeur wordt haost nooit bruukt. Allén veur vrömden giet die open.

HJ treuzelt. Dan löp e naor de veurdeur. Hij drukt op de bel die op het kezien zit. Het giet zwaor. Der komp niet veul geluud oet. Schuw kik e deur het raom naost de deur en zöt de stienen op de vensterbaank.

Opiens is de deur lös. HJ kik stief veur zuch. Zöt allén een blauwe trui met een raand van roze rozen. Hij blif naor de rozen kieken en zeg:

‘Woj ok lötten kopen veur de bazaar van school?’

HJ heurt hoe de vrouw heur aodem naor binnen zög. Onhandig rommelt e in de plastic tas en stek het boekie naor veuren. Een smalle haand met sproeten en een ring met een grote roze stien pakt het boekie an.



Dan slag e de ogen op. Ze is vort. HJ heurt voetstappen wiederop in het hoes. Hij kik de gang in. Een vloer van rooie tegels. An het eind een blauwe deur die lös stiet. Hij zöt de vrouw over de keukentaofel bugen en heurt heur de lötten ofscheuren. Dan klinkt gerinkel van munten en komp ze op hum toelopen. HJ kik weer naor de trui met de rozen. Ze komt hum bekend veur. Hef e die niet eerder zien?

Ze lat het geld in zien portemonnee vallen.

‘Bedankt’, zeg HJ. Hij draait zuch um en löp deur de opening in de heeg naor de straat. Achter hum giet de deur weer zachies dicht.

HJ leunt tegen de eerste de beste eik. Hij begrip niet waarom e zuch bang vuult. Of is e zenuwachtig? Of verlegen?

'Ik ben staapelgek', zeg e hardop. Hij trapt tegen de boom. 'Au!'

Hij is vergeten dat e zachte rubberleerzen an hef.

Dan pakt'e het löttenboekie oet de tas. Hoeveul lötten hef ze eigenlijk kocht? Hij slag het veurblad van het boek um en kik verbiesterd naor de kartonnen achterkaant.

Het boekie is hielemaol leeg! Ze hef ze allemaol kocht!



Neisgierig?

Bi'j neisgierig hoe het verhaal van HJ wieder giet? Vraag dan an je pap of man of ze het boekien veur je kopen wilt.

Het kost mar € 9,95 en je kunt het kopen in de boekhandel of bestellen op de webwinkel van Het Drentse Boek (www.hetdrentseboek.nl).

Vier moesies op een rijgie
 Die gaven een partijgie
 Zie dreugen hoge boordties
 Tot an heur spitse oorties
 En grieze jassies, mooi en fien
 Daorunder vessies van satien.

Maor opiens keek deur 'n kiertie
 Een poesie naor heur pleziertie
 Wat schrökken toen de moesies
 En renden naor heur hoeries
 Ze leuten zomar alles in de steek
 Allien, umdat 'n poesie naor heur keek.



Janny Kok-Wolbers

Een hiele grote dikke eulifant
 Die benterde deur 't girrelzand
 Maor boven op zien briede ruggie
 Daor leup hard, een kleine mugge

Die eulifant zo groot en dik
 Had an die mugge niet veul schik
 Met zien slurf bleus e die mugge
 Van zien dikke briede ruggie

De mugge vleug met een bocht
 Gauw naor boven in de locht
 Als maor wieder de wereld in
 Dat was de eulifant naor 't zin.



Janny Kok-Wolbers

KLEURPLAAT VEUR DE GROEPEN 1, 2 EN 3

Kleur dizze plaat mooi in. Wij viendt het nog veul mooier aj der ok nog wat bij tiekent. Ie kunt der een mooie pries mit verdienen!

Stuur de ingekleurde plaat veur 20 april 2012 op naor Huus van de Taol, Postbus 163, 9410 AD Beilen. Uut: *Het Rollegie*, ISBN 978 90 6509 315 8



Naam:


Adres:

Woonplaats:

Ik zit in groep:



Het Drents tidschrift Maandewark verschiend zes keer in 't jaor en stiet vol mit kôrte verhalen, gedichten, columns en historische verhalen. Het blad hef 34 bladzieden en is fraai in kleur uitvoerd. Het abonnementsgeld is 13 euro in 't jaor.



In het Drents Letterkundig Tidschrift Roet is zowel Drentse as Nederlandse proza en poëzie opneumen. Dit blad verschiend elk kwartaal en een abonnement kost 13,50 euro in 't jaor.



De Taolkraant is een blad veur de donateurs van het Huus van de Taol en verschiend 4 maal in 't jaor. **Donateur** van het Huus van de Taol kuj worden veur 26 euro in 't jaor en dan kriek jaarlijks ok nog een nei Drents boek kedo.

Je kunt ok **Huusvriend** van het Huus van de Taol worden. Dat kost 10 euro in 't jaor. Dan kriek oenze digitale neisbrief en ien keer in 't jaor hol wij een open dag en kuj oenze boeken en aandere producten kopen mit 20% kôrting.



Wattweg 2a, 9411 PX Beilen. Postbus 163, 9410 AD Beilen.
Telefoon [0593] 371010. E-mail: info@huusvandetaol.nl
Internet: www.huusvandetaol.nl